

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH

<http://www.parlimen.gov.my>

HARI RABU, 5 MAC 2025, PUKUL 10.00 PAGI

Bil. 17

PERTANYAAN-PERTANYAAN BAGI JAWAB LISAN

1. PR-1541-L28866

Dato' Ngeh Koo Ham [Beruas] minta **MENTERI SUMBER ASLI DAN KELESTARIAN ALAM** menyatakan apakah tindakan susulan yang akan diambil oleh Kerajaan di Jajahan Gua Musang, Kelantan memandangkan beberapa orang telah dibunuh oleh gajah dan harimau kebelakangan ini di kawasan tersebut dan penduduk hidup dalam ketakutan dan banyak tanam-tanaman telah dirosakkan oleh gajah-gajah yang berkeliaran.

2. PR-1541-L28816

Tuan Haji Wan Hassan bin Mohd Ramli [Dungun] minta **MENTERI PEMBANGUNAN USAHAWAN DAN KOPERASI** menyatakan perancangan Kementerian dalam menyediakan sokongan kepada usahawan kecil dan sederhana di Parlimen Dungun agar mereka dapat terus berkembang, terutamanya dalam menghadapi cabaran ekonomi sekarang.

3. PR-1541-L28978

Tuan Lee Chuan How [Ipoh Timor] minta **MENTERI PERALIHAN TENAGA DAN TRANSFORMASI AIR** menyatakan dasar Kementerian dalam memperkembang projek-projek ladang solar melalui penggunaan tasik-tasik semula jadi dan lombong-lombong sedia ada.

4. PR-1541-L28946

Datuk Haji Ahmad Amzad bin Mohamed @ Hashim [Kuala Terengganu] minta **MENTERI PELABURAN, PERDAGANGAN DAN INDUSTRI** menyatakan langkah Kerajaan untuk memastikan Perjanjian Rangka Kerja Ekonomi Digital ASEAN (DEFA) akan merapatkan jurang pembangunan digital antara negara anggota, serta bagaimana Malaysia sebagai Pengerusi ASEAN akan memimpin usaha ini untuk memastikan transformasi digital yang inklusif di rantau ini.

5. PR-1541-L29035

Tuan Prabakaran A/L M Parameswaran [Batu] minta **MENTERI SAINS, TEKNOLOGI DAN INOVASI** menyatakan adakah Kementerian mempunyai sebarang kerjasama dengan negara-negara yang lebih maju dalam teknologi tenaga nuklear seperti Perancis atau Jepun bagi membantu Malaysia membangunkan infrastruktur nuklear sebagai alternatif kepada 'sumber tenaga' yang selamat dan efisien.

6. PR-1541-L28628

Datuk Larry Soon @ Larry Sng Wei Shien [Julau] minta **MENTERI PENDIDIKAN** menyatakan usaha yang sedang dilaksanakan oleh Kementerian untuk memastikan bekalan air bersih disalurkan ke sekolah-sekolah di kawasan khususnya sekolah di luar bandar yang belum mempunyai akses air bersih. Jelaskan langkah-langkah konkrit yang diambil untuk menangani isu ini serta jangka masa pelaksanaannya.

7. PR-1541-L27892

Dato' Hajah Mumtaz binti Md Nawli [Tumpat] minta **PERDANA MENTERI** menyatakan langkah Kerajaan memastikan logo halal dari luar negara memenuhi piawaian seumpama JAKIM dan rancangan memperketatkan prosedur pengiktirafan halal antarabangsa.

8. PR-1541-L28843

Puan Yeo Bee Yin [Puchong] minta **MENTERI SUMBER ASLI DAN KELESTARIAN ALAM** menyatakan adakah Kementerian merancang untuk mengawal selia pelepasan efluen dari kilang-kilang dengan menggunakan *loading* dan bukannya *concentration*, terutamanya di kawasan-kawasan yang padat dengan kilang seperti Pasir Gudang. Apakah langkah-langkah yang diambil.

9. PR-1541-L27843

Tuan Sabri bin Azit [Jerai] minta **MENTERI PENDIDIKAN TINGGI** menyatakan perancangan untuk memperkasa AUKU dalam memastikan media sosial digunakan sebaiknya sebagai platform perdebatan secara kritis, perkongsian maklumat yang benar dan bukan medan menabur fitnah.

10. PR-1541-L28471

Tuan Jimmy Puah Wee Tse [Tebrau] minta **PERDANA MENTERI** menyatakan proses untuk tukar alamat mengundi sekarang ini agak rumit dan susah menyebabkan pengundi tidak tukar tempat mengundi walaupun telah menetap di tempat baharu. Adakah Kerajaan mempunyai perancangan untuk menjadikan proses ini lebih mudah dan relevan sesuai dengan kemajuan teknologi semasa.

11. PR-1541-L28255

Tuan Muhammad Ismi bin Mat Taib [Parit] minta **MENTERI PERLADANGAN DAN KOMODITI** menyatakan langkah-langkah yang telah diambil oleh Kementerian untuk mengatasi masalah serangan ulat daun yang membantutkan pengeluaran kelapa sawit di seluruh negara.

12. PR-1541-L28282

Dato Dr. Richard Rapu @ Aman anak Begri [Betong] minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah yang diambil oleh Kementerian untuk memperkukuh penyertaan golongan kurang upaya dalam masyarakat termasuk pembangunan infrastruktur mesra OKU dan program latihan kerja bagi memastikan inklusiviti mereka.

13. PR-1541-L28752

Tuan Rushdan bin Rusmi [Padang Besar] minta **MENTERI PELANCONGAN, SENI DAN BUDAYA** menyatakan :

- (a) usaha untuk mengangkat perkampungan warisan dan budaya Baba & Nyonya, Serani, Chetiyar sebagai produk pelancongan khususnya di Melaka dan Pulau Pinang; dan
- (b) usaha untuk mengadakan ciri-ciri khas etnik ini secara bertulis supaya warisan dan budaya mereka dipelihara dan tidak pupus ditelan zaman.

14. PR-1541-L28129

Tuan Haji Ahmad Johnie bin Zawawi [Igan] minta **MENTERI PENDIDIKAN** menyatakan apakah dapatan atau hasil lawatan Kementerian di kawasan Parlimen Igan selepas Program Tindak Susul Parlimen yang dibuat pada bulan September tahun lepas. Apakah perancangan yang akan dilakukan untuk menambah baik kualiti pendidikan di sekolah-sekolah di kawasan Parlimen Igan.

15. PR-1541-L28644

Dato' Rosol bin Wahid [Hulu Terengganu] minta **MENTERI PERDAGANGAN DALAM NEGERI DAN KOS SARA HIDUP** menyatakan pecahan kos diperuntukkan bagi setiap program di bawah Inisiatif Payung Rahmah untuk 2025 bagi membantu meringankan bebanan kos sara hidup yang terus membebankan rakyat.

16. PR-1541-L27676

Puan Syerleena binti Abdul Rashid [Bukit Bendera] minta **MENTERI PEMBANGUNAN WANITA, KELUARGA DAN MASYARAKAT** menyatakan :

- (a) langkah Kementerian untuk memperluaskan akses kepada program intervensi awal dan terapi untuk kanak-kanak autisme, terutama di kawasan luar bandar; dan
- (b) bagaimana Kementerian merancang meningkatkan kesedaran tentang autisme di sekolah dan melatih guru untuk menyokong pelajar autisme secara inklusif.

17. PR-1541-L(5)00317

Dato' Wira Dr. Ku Abd Rahman bin Ku Ismail [Kubang Pasu] minta **MENTERI SUMBER ASLI DAN KELESTARIAN ALAM** menyatakan langkah Kementerian bagi membanteras kemasukan e-waste yang diseludup secara haram dan diproses di Malaysia sepertimana yang berlaku baru-baru ini. Ini kerana sejak kebelakangan ini, Malaysia menjadi antara destinasi utama lambakan e-waste global khususnya dari Amerika Syarikat, United Kingdom, China, Jepun dan sebagainya.

[Pertanyaan di bawah PM 22(5)]

18. PR-1541-L27603

Tuan Sanisvara Nethaji Rayer A/L Rajaji [Jelutong] minta **PERDANA MENTERI** menyatakan apakah langkah-langkah yang sedang diambil oleh Kerajaan sekarang untuk merombak Lembaga Kelayakan Profesion Undang-Undang kerana sejak kebelakangan ini terdapat banyak rungutan dan aduan mengenai peratusan pelajar-pelajar yang lulus peperiksaan Sijil Amalan Guaman dan yuran peperiksaan Sijil Amalan Guaman yang semakin meningkat.

19. PR-1541-L27933

Datuk Dr. Nik Muhammad Zawawi bin Haji Salleh [Pasir Puteh] minta **MENTERI PENDIDIKAN** menyatakan adakah pihak Kementerian mempunyai dapatan kajian yang komprehensif dalam mempertimbang semula pelaksanaan peperiksaan awam utama di peringkat sekolah rendah seumpama UPSR yang menjadi indikator utama yang seragam seluruh negara berbanding pelaksanaan pelbagai mekanisme ujian ketika ini.

20. PR-1541-L27875

Datuk Hajah Siti Aminah binti Aching [Beaufort] minta **MENTERI PERLADANGAN DAN KOMODITI** menyatakan usaha Kementerian dalam mengatasi pengurangan kawasan tanaman sawit di Malaysia dan pengeluaran minyak sawit mentah (MSM) yang menyaksikan penurunan dalam tempoh sepuluh tahun.

21. PR-1541-L28645

Dato' Rosol bin Wahid [Hulu Terengganu] minta **MENTERI PERDAGANGAN DALAM NEGERI DAN KOS SARA HIDUP** menyatakan peraturan atau perundangan yang sudah dirangka Kementerian dengan penyedia platform media sosial selepas Lesen CASP dikuatkuasakan bermula 1 Januari 2025, bagi memastikan perniagaan dalam talian yang dijalankan oleh syarikat mahupun persendirian bebas daripada unsur penipuan atau *scammer*.

22. PR-1541-L29187

Tuan Ramkarpal Singh A/L Karpal Singh [Bukit Gelugor] minta **PERDANA MENTERI** menyatakan sebab Jabatan Peguam Negara perlu memohon untuk satu '*gag order*' berkenaan isu Titah Adendum kepada permohonan pengampunan oleh bekas Perdana Menteri Dato' Sri Najib Tun Razak memandangkan isu Titah Adendum tersebut memangnya sudah diketahui ramai dan di dalam pengetahuan umum.

23. PR-1541-L28465

Tuan Haji Kamal bin Ashaari [Kuala Krau] minta **MENTERI PERLADANGAN DAN KOMODITI** menyatakan pelan terperinci KPK untuk membangunkan lebih 420,000 hektar ladang getah terbiar yang telah dikenal pasti di seluruh negara mengambil kira cabaran yang dihadapi oleh para pekebun kecil serta aspek penyelenggaraan ladang getah.

24. PR-1541-L28979

Tuan Lee Chuan How [Ipoh Timor] minta **MENTERI PERALIHAN TENAGA DAN TRANSFORMASI AIR** menyatakan sama ada wujudnya dasar tarif elektrik khas untuk kilang-kilang pengeluar produk yang berkait langsung dengan infrastruktur tenaga boleh baharu seperti komponen panel solar, komponen jentera tenaga hidro dan lain-lain sebagai penggalak dan pemangkin industri.

25. PR-1541-L28714

Datuk Wira Hajah Mas Ermieyati binti Haji Samsudin [Masjid Tanah] minta **MENTERI PELANCONGAN, SENI DAN BUDAYA** menyatakan sejauh manakah pelaksanaan pengecualian visa (bagi tempoh 30 hari) kepada warganegara China dan India dan nyatakan jumlah pelancong antarabangsa dari negara tersebut yang melawat Malaysia pada tahun 2024 sepanjang tempoh pelaksanaan pengecualian visa di bawah Program Liberalisasi Visa.

26. PR-1541-L29094

Datuk Seri Panglima Haji Mohd Shafie bin Haji Apdal [Semporna] minta **PERDANA MENTERI** menyatakan adakah kerajaan bercadang untuk meminda Perlembagaan Persekutuan bagi menambah baik Akta Anti Lompat Parti dan membentangkan Akta Pendanaan Politik di Parlimen sebelum Pilihan Raya Umum ke-16.

27. PR-1541-L29167

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PELABURAN, PERDAGANGAN DAN INDUSTRI** menyatakan kejayaan positif yang dicapai khususnya dari sudut perdagangan, pelaburan serta politik antarabangsa hasil dari lawatan negara YAB Perdana Menteri ke luar negara khususnya lawatan negara ke Pakistan dan Bangladesh.

28. PR-1541-L29060

Tuan Prabakaran A/L M Parameswaran [Batu] minta **PERDANA MENTERI** menyatakan bagaimana Jabatan Wilayah Persekutuan memastikan bahawa projek-projek perumahan baru tidak hanya menyediakan tempat tinggal tetapi juga meningkatkan keselamatan dan kesejahteraan sosial bagi penduduk, terutamanya di kawasan urban yang padat.

29. PR-1541-L28928

Tuan Hassan bin Saad [Baling] minta **MENTERI PENDIDIKAN TINGGI** menyatakan sama ada Kementerian bercadang untuk membina sebuah institusi pendidikan tinggi (IPT) baharu di luar bandar terutamanya di daerah Baling.

30. PR-1541-L28499

Puan Young Syefura binti Othman [Bentong] minta **PERDANA MENTERI** menyatakan perancangan Kerajaan dalam memastikan kakitangan kontrak yang telah lama berkhidmat dan diserap ke dalam perjawatan tetap agar layak menerima peningkatan gaji yang setimpal dan dapat membantu dari sudut caruman KWSP dan kesan jangka panjang persaraan mereka.

31. PR-1541-L29062

Dr. Radzi Jidin [Putrajaya] minta **PERDANA MENTERI** menyatakan status terkini penggubalan RUU Pendanaan Politik, serta jumlah sesi libat urus yang telah dilaksanakan termasuk jumlah institusi, kumpulan dan individu yang terlibat dalam setiap sesi tersebut dan juga menyatakan bilakah RUU ini akan dibentangkan di Dewan Rakyat.

32. PR-1541-L29188

Tuan Ramkarpal Singh A/L Karpal Singh [Bukit Gelugor] minta **MENTERI PELABURAN, PERDAGANGAN DAN INDUSTRI** menyatakan status keahlian Malaysia di dalam kumpulan negara-negara BRICS memandangkan ancaman bakal Presiden Donald Trump mengenakan tarif 100 peratus ke atas negara-negara kumpulan tersebut.

33. PR-1541-L27900

Dato' Azman bin Nasrudin [Padang Serai] minta **PERDANA MENTERI** menyatakan secara terperinci kriteria dan kaedah yang digunakan dalam cadangan persempadanan semula kawasan pilihan raya Parlimen dan DUN, khususnya justifikasi penambahan kerusi yang dicadangkan serta implikasi kewangan kepada perbelanjaan negara.

34. PR-1541-L28651

Tuan Kesavan A/L Subramaniam [Sungai Siput] minta **MENTERI PENDIDIKAN** menyatakan apakah hasil terkini daripada intervensi kurikulum yang diperkenalkan oleh Kementerian pada tahun 2024, khususnya dalam memastikan murid tahun satu menguasai asas 3M.

35. PR-1541-L28997

Tuan Wan Ahmad Fayhsal bin Wan Ahmad Kamal [Machang] minta **MENTERI LUAR NEGERI** menyatakan senarai perjanjian dan triti persempadanan darat dan maritim yang telah ditandatangani oleh Kerajaan MADANI setakat Februari 2025 beserta garis masa untuk memuktamadkan perjanjian persempadanan yang sedia ada dengan negara-negara jiran bagi memperkukuh aspek kedaulatan dan keselamatan negara.

36. PR-1541-L28995

Dato' Haji Adnan bin Haji Abu Hassan [Kuala Pilah] minta **MENTERI PEMBANGUNAN WANITA, KELUARGA DAN MASYARAKAT** menyatakan mekanisme yang akan dilaksanakan Kementerian bagi meringankan beban kewangan dari aspek kos pendidikan bagi keluarga yang mempunyai anak autism melalui Bantuan Yuran Pembelajaran Anak Autisme.

37. PR-1541-L29168

Dato' Syed Abu Hussin bin Hafiz Syed Abdul Fasal [Bukit Gantang] minta **MENTERI PERDAGANGAN DALAM NEGERI DAN KOS SARA HIDUP** menyatakan jumlah keseluruhan penjimatan kos sara hidup yang telah dinikmati oleh rakyat Malaysia hasil keputusan dan tindakan bersepadu oleh Majlis Tindakan Sara Hidup Negara (NACCOL).

38. PR-1541-L29127

Tuan Syed Ibrahim bin Syed Noh [Ledang] minta **MENTERI PENDIDIKAN** menyatakan data atau bukti jangka panjang yang menunjukkan sama ada pelajar yang mengikuti sistem pendidikan semasa mampu mencapai tahap intelek dan kemahiran yang diinginkan oleh pasaran kerja dan negara, serta jelaskan kaedah penilaian keberkesanan dasar dan sistem pendidikan yang tuntas.

39. PR-1541-L28790

Dr. Siti Mastura binti Muhammad [Kepala Batas] minta **MENTERI PENDIDIKAN TINGGI** menyatakan :

- (a) senarai IPTA yang menyediakan fakulti, jabatan atau program-program yang melibatkan Artificial Intelligent (AI) dan bilakah akan ditawarkan; dan
- (b) apakah insentif Kementerian kepada IPTA dalam menggalakkan kampus-kampus menyediakan bidang AI dan jaminan peluang pekerjaan Kerajaan terhadap mahasiswa yang menyertai program-program ini.

40. PR-1541-L28584

Dr. Mohammed Taufiq bin Johari [Sungai Petani] minta **MENTERI SUMBER ASLI DAN KELESTARIAN ALAM** menyatakan adakah benar dakwaan yang ditimbulkan sesetengah pihak bahawa keluasan Tanah Rizab Melayu semakin berkurangan. Apakah langkah-langkah yang diambil oleh Kerajaan untuk memastikan tanah ini terus dilindungi dan dipelihara.

41. PR-1541-L28311

Dato' Haji Ahmad bin Saad @ Yahaya [Pokok Sena] minta **PERDANA MENTERI** menyatakan cadangan supaya sebarang keputusan besar melibatkan kepentingan negara dan aset strategiknya dibentangkan ke Jawatankuasa Pilihan Khas Parlimen bagi memastikan suatu keputusan yang tepat, matang serta tidak berkepentingan.

42. PR-1541-L29048

Puan Isnaraissah Munirah Majilis [Kota Belud] minta **MENTERI PENDIDIKAN** menyatakan pecahan jenis projek dan daerah yang terlibat melibatkan peruntukan RM1 bilion yang disediakan oleh Kementerian Pendidikan di Sabah bagi tahun 2025.

43. PR-1541-L28710

Dato' Sri Saifuddin Abdullah [Indera Mahkota] minta **MENTERI PELANCONGAN, SENI DAN BUDAYA** menyatakan langkah-langkah konkrit Kementerian dalam pelaksanaan dan penghayatan Dasar Kebudayaan Kebangsaan dan sejauh mana langkah-langkah tersebut menghasilkan kesan yang optimum.

44. PR-1541-L28684

Tuan Wong Chen [Subang] minta **MENTERI PERALIHAN TENAGA DAN TRANSFORMASI AIR** menyatakan sebab-sebab di sebalik pengenaan caj penghantaran (*wheeling charges*) yang tinggi bagi pengedaran tenaga maya, terutamanya apabila Malaysia masih ketinggalan dalam mencapai Energy Roadmap Goals 2025.

45. PR-1541-L27831

Datuk Seri Takiyuddin bin Hassan [Kota Bharu] minta **PERDANA MENTERI** menyatakan langkah yang diambil oleh Kerajaan bagi memperkasakan tahap kualiti perkhidmatan Jabatan Peguam Negara seiring dengan pertambahan bilangan kes perbicaraan dan mahkamah yang baru.

46. PR-1541-L29138

Tuan Lim Lip Eng [Kepong] minta **PERDANA MENTERI** menyatakan sama ada butiran minit mesyuarat Lembaga Pengampunan berkaitan bekas Perdana Menteri, Dato' Sri Najib Razak boleh dinyahklasifikasikan dan sama ada undang-undang Malaysia membenarkan tahanan di rumah sebagai hukuman.

47. PR-1541-L28958
Tan Sri Haji Abdul Hadi bin Awang [Marang] minta **MENTERI PELABURAN, PERDAGANGAN DAN INDUSTRI** menyatakan manfaat yang diterima oleh rakyat secara langsung hasil daripada Perjanjian Perkongsian Ekonomi Komprehensif (CEPA) antara Malaysia dengan negara anggota Majlis Kerjasama Teluk (GCC).
48. PR-1541-L29103
Datuk Seri Panglima Haji Mohd Shafie bin Haji Apdal [Semporna] minta **MENTERI PERALIHAN TENAGA DAN TRANSFORMASI AIR** menyatakan pelan perancangan mitigasi banjir di Sabah dan berapa jumlah projek mengatasi banjir yang sedang dan akan dibina di Sabah.
49. PR-1541-L27912
Tuan Jamaludin bin Yahya [Pasir Salak] minta **MENTERI PERLADANGAN DAN KOMODITI** menyatakan usaha proaktif MTIB untuk memberi nilai tambah kepada industri perkayuan di sebalik persaingan dengan negara-negara pengeksport produk kayu, sekaligus mencapai sasaran nilai eksport industri perkayuan sebanyak RM28 bilion menjelang 2030 sejajar dengan Pelan Strategik Industri Perkayuan Negara 2021-2025.
50. PR-1541-L28899
Tuan Lee Chean Chung [Petaling Jaya] minta **MENTERI LUAR NEGERI** menyatakan memandangkan Republik Filipina telah mengisytiharkan pewartaan akta baru berkenaan maritim negara tersebut pada November lalu, apakah kesan kepada pengisytiharan pewartaan akta baru tersebut kepada perairan Malaysia dan apakah tindakan yang telah diambil oleh pihak Malaysia terhadap tindakan Republik Filipina.
51. PR-1541-L29018
Tuan Syed Saddiq bin Syed Abdul Rahman [Muar] minta **MENTERI PELANCONGAN, SENI DAN BUDAYA** menyatakan langkah proaktif bagi memastikan Tahun Melawat Malaysia 2026 dapat dirasai oleh semua golongan dan di semua tempat terutamanya bagi kawasan luar bandar dan yang kurang mendapat liputan sebelum ini.
52. PR-1541-L28903
Tuan Mohamad Shafizan Haji Kepli [Batang Lupar] minta **MENTERI PERALIHAN TENAGA DAN TRANSFORMASI AIR** menyatakan status terkini Projek Mengatasi Banjir dan Hakisan Pantai di Sarawak terutama di kawasan Maludam.

53. PR-1541-L27974

Tuan Zakri bin Hassan [Kangar] minta **MENTERI PELANCONGAN, SENI DAN BUDAYA** menyatakan apakah langkah-langkah yang boleh diambil oleh Kementerian dalam usaha memajukan industri kraf di negeri Perlis sehingga kini.

54. PR-1541-L29144

Tuan Pang Hok Liong [Labis] minta **MENTERI PERALIHAN TENAGA DAN TRANSFORMASI AIR** menyatakan apakah justifikasi bagi rancangan TNB untuk menaikkan tarif elektrik sedangkan keuntungan bersih TNB setiap tahun melebihi RM10 bilion.

55. PR-1541-L29075

Tuan Mordi Bimol [Mas Gading] minta **PERDANA MENTERI** menyatakan apakah justifikasi untuk tidak mengkategorikan banjir kilat sebagai bencana yang layak menerima Bantuan Wang Ihsan (BWI) dan adakah kajian sedang dijalankan untuk menyemak semula kelayakan tersebut memandangkan banjir kilat biasa juga membawa kerugian kepada mangsa.

56. PR-1541-L29164

Dato Anyi Ngau [Baram] minta **MENTERI PERLADANGAN DAN KOMODITI** menyatakan jumlah peruntukan tahunan bagi pekebun-pekebun kecil untuk penanaman baru dan tanaman semula sawit di seluruh negara sejak 2020 dan jumlah pekebun-pekebun kecil di Sarawak dan kawasan Baram yang telah dibantu oleh Kementerian.

57. PR-1541-L28096

Tuan Fong Kui Lun [Bukit Bintang] minta **PERDANA MENTERI** menyatakan rasional pembinaan tujuh kiosk di kawasan Pocket Park di Jalan Alor yang telah mengambil separuh ruang hijau dan menghalang hadapan kedai. Apakah tindakan DBKL untuk menangani kebimbangan peniaga dan penduduk setempat.

58. PR-1541-L27969

Tuan Zakri bin Hassan [Kangar] minta **MENTERI PENDIDIKAN** menyatakan apakah Kementerian ini menyalurkan manual prosedur kerja kepada sekolah-sekolah untuk menjalankan aktiviti mereka dan apakah tindakan Kementerian bagi sekolah yang tidak mengikut prosedur kerja ini.

59. PR-1541-L29088

Dato Henry Sum Agong [Lawas] minta **PERDANA MENTERI** menyatakan langkah ke arah pelaksanaan projek yang telah diluluskan agar dilaksanakan lebih awal, lancar dan tepat pada masa yang ditetapkan.

60. PR-1541-L29165

Tuan Chong Chieng Jen [Stampin] minta **MENTERI PENDIDIKAN** menyatakan pengisian guru di semua sekolah Sarawak mengikut setiap aliran sekolah. Nyatakan juga usaha KPM dalam memastikan guru di Sarawak adalah mencukupi dan apakah hasil pengambilan khas guru Sarawak yang dilaksanakan pada tahun 2024.

61. PR-1541-L29044

Dato' Khair bin Mohd Nor [Ketereh] minta **MENTERI LUAR NEGERI** menyatakan langkah proaktif Kerajaan bagi mengenal pasti operasi pusat operasi *scammer* termasuk syarikat *scammer* beroperasi secara terbuka di Zon Ekonomi Khas Segi Tiga Emas (GTSEZ), Laos termasuk warga Malaysia yang di kenal pasti sebagai mangsa.

62. PR-1541-L27601

Tuan Sanisvara Nethaji Rayer A/L Rajaji [Jelutong] minta **MENTERI PENDIDIKAN TINGGI** menyatakan bilangan atau jumlah pelajar-pelajar India yang telah diterima masuk ke Institusi Pendidikan Tinggi Awam (IPTA) sejak sistem kuota dibatalkan oleh YAB Perdana Menteri pada 30 Jun 2024.

63. PR-1541-L28027

Dato' Wira Dr. Ku Abd Rahman bin Ku Ismail [Kubang Pasu] minta **MENTERI PENDIDIKAN TINGGI** menyatakan :

- (a) langkah dan strategi Kementerian untuk mengutip balik pinjaman PTPTN yang tertunggak sejumlah RM11.32 bilion setakat September 2024; dan
- (b) langkah yang diambil oleh Kementerian terhadap lebih 430,000 peminjam yang tidak pernah membayar balik pinjaman PTPTN yang melibatkan tunggakan RM5.46 bilion.

64. PR-1541-L28049

Tuan Azli bin Yusof [Shah Alam] minta **MENTERI PENDIDIKAN** menyatakan status terkini pencapaian pelaksanaan projek, jumlah yang telah dibelanjakan pada tahun 2024 dan peruntukan yang akan digunakan pada tahun 2025 untuk pembinaan dua buah sekolah di Parlimen Shah Alam, iaitu SK Setia Alam 2 dan SMK Denai Alam.

65. PR-1541-L28087

Dato' Haji Mohd Suhaimi bin Abdullah [Langkawi] minta **MENTERI PERALIHAN TENAGA DAN TRANSFORMASI AIR** menyatakan sama ada pelantikan Ketua Setiausaha Negara sebagai pengerusi Suruhanjaya Tenaga melanggar Surat Pekeliling Am Bilangan 5 Tahun 2024 yang melarang ahli pentadbiran awam daripada dilantik sebagai pengerusi Badan Berkanun Persekutuan (BBP).

66. PR-1541-L29123

Tuan Syed Ibrahim bin Syed Noh [Ledang] minta **PERDANA MENTERI** menyatakan :

- (a) pelan Kerajaan dalam memastikan jaringan keselamatan sosial rakyat terus seimbang pasca reformasi institusi ekonomi, terutama dalam menangani kos sara hidup meningkat; dan
- (b) impak dasar dan tindakan Kerajaan terkait aspek jaringan keselamatan sosial terhadap rakyat terutamanya golongan rentan.

67. PR-1541-L(5)00314

Dr. Radzi Jidin [Putrajaya] minta **MENTERI PELANCONGAN, SENI DAN BUDAYA** menyatakan secara terperinci jumlah permohonan untuk Malaysia My Second Home (MM2H) bagi setiap tahun bermula 2015 sehingga 2024 berdasarkan negara pemohon serta memperincikan jumlah permohonan yang diluluskan bagi setiap tahun tersebut.

[Pertanyaan di bawah PM 22(5)]

68. PR-1541-L28413

Puan Teresa Kok Suh Sim [Seputeh] minta **PERDANA MENTERI** menyatakan :

- (a) sebab kes penipuan bank dan scam masih berleluasa walaupun pelbagai inisiatif dan tindakan telah dilaksanakan oleh Kerajaan; dan
- (b) langkah yang akan diambil oleh Bank Negara dan Kerajaan untuk menangani jenayah kewangan yang semakin kompleks.

69. PR-1541-L28362

Dr. Haji Abd Ghani bin Ahmad [Jerlun] minta **PERDANA MENTERI** menyatakan langkah Kerajaan untuk membendung amalan nepotisme dan kronisme dalam pentadbiran awam mahupun lantikan politik di bawah Kerajaan MADANI.

70. PR-1541-L29160

Tuan Chong Zhemín [Kampar] minta **MENTERI LUAR NEGERI** menyatakan langkah-langkah yang diambil untuk menyelamatkan warga Malaysia yang ditipu di luar negara dan dipaksa untuk menjalankan *cyber scam*.

71. PR-1541-L27827

Dato' Haji Abdul Khalib bin Abdullah [Rompin] minta **MENTERI PERALIHAN TENAGA DAN TRANSFORMASI AIR** menyatakan apakah strategi Kementerian untuk memastikan penggunaan dana Akaun Amanah Bekalan Industri Elektrik (AAIBE) dan Kumpulan Wang Industri Elektrik (KWIE) secara optimum bagi memperkasa industri bekalan elektrik di bawah Pelan Strategik PETRA 2023-2030.

72. PR-1541-L28386

Datuk Suhaimi bin Nasir [Libaran] minta **MENTERI PELABURAN, PERDAGANGAN DAN INDUSTRI** menyatakan insentif yang ditawarkan oleh Kerajaan untuk menggalakkan pelaburan domestik dan antarabangsa ke negeri Sabah dan berapa banyakkah pelaburan domestik dan antarabangsa yang telah diluluskan oleh Kerajaan bagi Negeri Sabah pada tahun 2024.

73. PR-1541-L28355

Tuan Ahmad Fadhli bin Shaari [Pasir Mas] minta **PERDANA MENTERI** menyatakan sebab Titah Adendum oleh Yang di-Pertuan Agong lewat diketahui kewujudannya termasuk di pihak Kerajaan sendiri sehingga mencetuskan pelbagai polemik dan keclaruan dalam menentukan kesahihannya.

74. PR-1541-L28546

Tuan Tan Kar Hing [Gopeng] minta **MENTERI SUMBER ASLI DAN KELESTARIAN ALAM** menyatakan status semasa pengukuran sempadan darat antarabangsa di antara Malaysia dengan negara-negara jiran dan bila dijangka akan dapat memuktamadkan sempadan-sempadan ini.

75. PR-1541-L27791

Tuan Haji Mohd Misbahul Munir bin Masduki [Parit Buntar] minta **MENTERI PENDIDIKAN TINGGI** menyatakan perancangan terperinci KPT terhadap cadangan supaya setiap universiti awam di seluruh negara menubuhkan fakulti kecerdasan buatan atau memasukkan elemen teknologi baharu AI dalam fakulti sedia ada sebagai langkah mengurangkan jurang ketidakpadanan graduan dengan pasaran pekerjaan.

76. PR-1541-L27766

Datuk Matbali bin Musah [Sipitang] minta **MENTERI PERALIHAN TENAGA DAN TRANSFORMASI AIR** menyatakan adakah Parlimen Sipitang termasuk di dalam Rolling Plan Keempat (RP4) RMK Ke-12 yang memperuntukkan kos sebanyak RM674.4 juta ataupun Rolling Plan Ke-5 (RP5) yang memperuntukkan sebanyak RM116.77 juta. Ini kerana Parlimen Sipitang merupakan kawasan yang dilanda banjir dan memerlukan kos untuk membina tebatan banjir di kawasan yang berisiko banjir.

77. PR-1541-L28423

Tuan Mohd Nazri bin Abu Hassan [Merbok] minta **MENTERI PERALIHAN TENAGA DAN TRANSFORMASI AIR** menyatakan persediaan dan tindakan Kementerian jika berlaku kemarau panjang berdasarkan ramalan yang dijalankan oleh Institut Pendidikan Hidraulik Kebangsaan Malaysia (NAHRIM) mengenai musim kemarau serius yang bakal melanda Malaysia antara 2025 sehingga 2035.

78. PR-1541-L28498

Dato' Mohd Isam bin Mohd Isa [Tampin] minta **MENTERI PERDAGANGAN DALAM NEGERI DAN KOS SARA HIDUP** menyatakan pendekatan baharu untuk memastikan bekalan minyak masak paket bersubsidi sentiasa berada dalam pasaran dan mudah diakses oleh golongan yang layak memanfaatkannya serta sejauh manakah persiapan Kementerian untuk memastikan tiada gangguan bekalan stok minyak berkenaan menjelang Ramadhan dan Syawal.

79. PR-1541-L28526

Puan Wong Shu Qi [Kluang] minta **MENTERI PELABURAN, PERDAGANGAN DAN INDUSTRI** menyatakan impak sekatan eksport cip AI dan teknologi pusat data oleh Amerika Syarikat terhadap perkembangan pusat data di Malaysia, memandangkan negara kita termasuk dalam kategori tahap 2, dan apakah langkah yang diambil untuk mengatasi cabaran ini.

80. PR-1541-L27782

Tuan Roslan bin Hashim [Kulim Bandar Baharu] minta **MENTERI PENDIDIKAN** menyatakan adakah pihak KPM merancang untuk mengubah jadual peperiksaan SPM supaya tidak bertembung dengan musim tengkujuh terutama di Pantai Timur.

81. PR-1541-L28075

Tuan Ganabatirau A/L Veraman [Klang] minta **PERDANA MENTERI** menyatakan apakah program-program yang akan diadakan di bawah MITRA pada tahun depan dan berapa peruntukan yang ditetapkan untuk tiap-tiap program yang disenaraikan.

82. PR-1541-L28199

Dato' Sri Doris Sophia anak Brodi [Sri Aman] minta **MENTERI PEMBANGUNAN WANITA, KELUARGA DAN MASYARAKAT** menyatakan :

- (a) perancangan Kementerian untuk memperkenalkan pendidikan dan latihan kepada semua pengusaha TASKA atau pusat jagaan kanak-kanak dalam aspek keselamatan, penjagaan emosi, dan kebajikan kanak-kanak; dan
- (b) adakah Kementerian akan mengadakan penilaian berkala ke atas standard operasi dan fasiliti di setiap pusat jagaan kanak-kanak di seluruh negara.

83. PR-1541-L27664

Dato' Sri Tuan Ibharim bin Tuan Man [Kubang Kerian] minta **MENTERI PERALIHAN TENAGA DAN TRANSFORMASI AIR** menyatakan :

- (a) adakah Kementerian telah memuktamadkan jadual tarif elektrik baharu yang akan dilaksanakan di bawah Tempoh Kawal Selia 4 (RP4); dan
- (b) langkah bagi memastikan subsidi elektrik bersasar melindungi pengguna domestik dengan penggunaan kurang daripada 1,500 kWj sebulan di bawah RP4.

84. PR-1541-L28035

Datuk Seri Utama Ir. Hasni bin Mohammad [Simpang Renggam] minta **MENTERI SUMBER ASLI DAN KELESTARIAN ALAM** menyatakan bagaimana RUUPIN dapat disesuaikan untuk berkembang seiring dengan perubahan keperluan tempatan dan antarabangsa dalam mencapai komitmen *Paris Agreement* dan sasaran NDC.

85. PR-1541-L27989

Datuk Che Mohamad Zulkifly bin Jusoh [Besut] minta **MENTERI SUMBER ASLI DAN KELESTARIAN ALAM** menyatakan :

- (a) jumlah kes kejadian lubang benam (*sinkhole*) yang dilaporkan di negara ini dalam lima tahun terakhir; dan

- (b) usaha Kementerian dalam mengkaji semula undang-undang atau peraturan yang berkaitan dengan pembinaan di kawasan berisiko tinggi terhadap kejadian lubang benam (*sinkhole*) demi keselamatan awam.

86. PR-1541-L27591

Tuan Haji Onn bin Abu Bakar [Batu Pahat] minta **PERDANA MENTERI** menyatakan status aset dan harta wakaf yang bernilai lebih RM1.3 trilion yang belum diterokai sepenuhnya dan apakah langkah untuk memacu pembangunan sosioekonomi negara terutama umat Islam.

87. PR-1541-L29025

Datuk Haji Idris bin Haji Ahmad [Bagan Serai] minta **PERDANA MENTERI** menyatakan sejauh manakah penglibatan Kerajaan dalam pertubuhan bukan Kerajaan antarabangsa (INGO) dalam mempromosikan nilai-nilai keluarga Islam.

88. PR-1541-L28222

Dato' Seri Dr. Wan Azizah Dr. Wan Ismail [Bandar Tun Razak] minta **MENTERI PENDIDIKAN** menyatakan sejauh mana pelaksanaan program "Anak Kita" pada September 2024 untuk menangani masalah keciciran pembelajaran di kalangan pelajar di Malaysia, apakah langkah-langkah yang akan diambil selepas tamat program dan pelaksanaan kaunseling kepada pelajar-pelajar ini.

89. PR-1541-L28065

Ir. Ts. Zahir bin Hassan [Wangsa Maju] minta **PERDANA MENTERI** menyatakan :

- (a) kesan dan akibat Monsun Timur Laut bagi tahun 2024/2025 berbanding dengan 5 tahun kebelakang; dan
- (b) apakah perbezaan *preparedness*, *response* dan *recovery* dalam perancangan dan pelaksanaan menghadapi Monsun Timur Laut kali ini berbanding tahun-tahun sebelum ini.

ATURAN URUSAN MESYUARAT DAN USUL-USUL

1. (D.R.4/2025) Rang Undang-Undang Perkhidmatan Parlimen 2025 -
Menyambung semula perbahasan atas masalah “Bahawa Rang Undang-Undang ini dibacakan kali yang kedua sekarang,” (4 Mac 2025)

[Perdana Menteri]

2. (D.R.2/2025) Rang Undang-Undang Perkhidmatan Bomba (Pindaan) 2025. **Bacaan Kali Yang Kedua**

[Menteri Perumahan dan Kerajaan Tempatan]

3. (D.R.10/2025) Rang Undang-Undang Pemerangkapan, Penggunaan dan Penyimpanan Karbon 2025. “

[Menteri Ekonomi]

4. (D.R.9/2025) Rang Undang-Undang Iltizam Kecekapan Perkhidmatan Kerajaan 2025. “

[Menteri di Jabatan Perdana Menteri]

5. (D.R.8/2025) Rang Undang-Undang Kumpulan Wang Simpanan Pekerja (Pindaan) 2025. “

[Menteri Kewangan]

6. (D.R.19/2024) Rang Undang-Undang Mufti (Wilayah-Wilayah Persekutuan) 2024. “

[Perdana Menteri]

7. (D.R.47/2024) Rang Undang-Undang Suruhanjaya Komunikasi dan Multimedia Malaysia (Pindaan) 2024 - **Menyambung semula perbahasan atas masalah “Bahawa Rang Undang-Undang ini dibacakan kali yang kedua sekarang,” (10 Disember 2024)**

[Menteri Komunikasi]

8. PR-1541-U(27)369

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk merangka dan membentangkan sebuah perancangan jangka masa panjang untuk 30 tahun ke hadapan dalam mencorak masa depan dan hala tuju negara di mana setiap Rancangan Malaysia 10 tahun, lima tahun dan belanjawan negara akan diselaraskan berpandukan perancangan tersebut.

Walaupun terdapat dasar sedia ada, tetapi perancangan ini tidak cukup kukuh untuk merancang secara holistik dan menyelesaikan '*complexity*' kerana tempoh adalah singkat dan sederhana. Kerajaan boleh mencontohi negara serantau dengan menyelaraskan rancangan 5 tahun dengan strategi jangka panjang, di mana setiap pelan dan dasar harus selari dengan visi jangka panjang.

Penjajaran strategik ini akan meningkatkan daya tahan negara dan meletakkan Malaysia sebagai pemain berdaya saing di peringkat global. Setiap RMK seharusnya berfungsi sebagai batu loncatan untuk mencapai wawasan keseluruhan, membolehkan peruntukan sumber yang lebih berkesan dan responsif kepada cabaran yang muncul."

[Menteri Ekonomi]

9. PR-1541-U(27)370

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk menubuhkan jawatankuasa khas yang terdiri daripada pelbagai Kementerian untuk mengkaji mekanisme memastikan kemampanan sistem penjagaan kesihatan dalam negara.

Perkhidmatan kesihatan awam, yang sudah mengalami tekanan seperti peningkatan permintaan, had kewangan dan ketidaksamaan dalam akses kepada penjagaan. Jawatankuasa khas merentas Kementerian berperanan menangani kebimbangan ini dan meneroka mekanisme pembiayaan yang inovatif dan inklusif.

Dengan mengutamakan kemampanan penjagaan kesihatan, kita boleh memastikan penjagaan kesihatan yang berkualiti kekal dapat diakses oleh semua rakyat, tanpa mengira status kewangan mereka, di samping mengurangkan beban kewangan kepada Kerajaan."

[Menteri Kesihatan]

10. PR-1541-U(27)371

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk mengorientasikan semula dasar penyelidikan dan pembangunan (R&D) untuk memupuk inovasi yang lebih besar dalam syarikat dengan meningkatkan kerjasama dengan universiti.

Dengan mewujudkan hubungan yang lebih kukuh antara penyelidikan akademik dan industri, matlamatnya adalah untuk memacu lebih banyak inovasi yang dikomersialkan yang boleh bersaing di peringkat global.

Pada masa yang sama, Kerajaan perlu meningkatkan fungsi institusi penyelidikan Kerajaan dengan memudahkan pemindahan teknologi global dan membantu syarikat tempatan memanfaatkan teknologi termaju.

Dengan menyediakan akses kepada sumber teknologi sedia ada, Kerajaan membolehkan syarikat memanfaatkan inovasi ini untuk pembangunan produk dan pertumbuhan perniagaan, akhirnya meningkatkan kelebihan daya saing Malaysia dalam pasaran global."

[Menteri Sains, Teknologi dan Inovasi]

11. PR-1541-U(27)372

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan kertas putih strategi jangka pendek, sederhana dan panjang bagi menguatkuasakan peraturan yang lebih ketat mengenai penyelenggaraan kenderaan dan keselamatan muatan, meningkatkan pemeriksaan, dan mengenakan penalti yang lebih tinggi bagi pelanggaran peraturan jalan raya.

Statistik menunjukkan 825 kenderaan berat terlibat dalam kemalangan maut dalam tempoh sepuluh bulan pertama tahun ini, menyumbang kepada sebahagian besar daripada 17,905 kemalangan maut.

Latihan tetap untuk pemandu kenderaan berat, ditambah dengan keperluan pelesenan yang dipertingkatkan, akan memastikan amalan keselamatan jalan raya yang lebih baik. Pelaburan dalam infrastruktur dan teknologi jalan raya, seperti sistem keselamatan dalam trak, juga penting untuk meminimumkan risiko. Kempen kesedaran awam dan pengumpulan data yang lebih baik boleh menyasarkan lagi tempoh berisiko tinggi, seperti musim perayaan, untuk mencegah kemalangan dan meningkatkan keselamatan jalan raya secara keseluruhan."

[Menteri Pengangkutan]

12. PR-1541-U(27)384

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia.

Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi. Memohon pihak Kerajaan mengambil tindakan dengan kadar segera.”

[Menteri Pertanian dan Keterjaminan Makanan]

13. PR-1541-U(27)385

Dato' Seri Dr. Shahidan bin Kasim [Arau] akan mencadangkan :

“Bahawa Dewan Rakyat ini menggesa supaya Kerajaan mengambil langkah proaktif dalam menangani kes penderaan kanak-kanak yang berlarutan dan sehingga kini belum ada penyelesaian tuntas. Statistik Kementerian Pembangunan Wanita, Keluarga dan Masyarakat menunjukkan sehingga November 2023, kira-kira 1,069 kes penderaan kanak-kanak dilaporkan yang disebabkan oleh kecuaian ibu bapa dan penjaga.

Kanak-kanak adalah masa depan negara. Usaha menangani isu pengabaian dan penderaan kanak-kanak yang dilihat membimbangkan perlu ditangani secara menyeluruh dan membabitkan pelbagai pihak.

Lantaran itu, pihak Kerajaan wajar menangani pantas menghentikan kitaran dera ini dengan target ‘Dera Sifar’ menerusi langkah-langkah proaktif seperti mewajibkan kursus penjagaan anak, mewujudkan sistem pemantauan berkala serta meneliti semula undang-undang serta garis panduan yang berkaitan. Perkhidmatan dalam hal membabitkan perlindungan, pemulihan dan pemeliharaan kanak-kanak perlu diperkukuh dan direalisasikan. Memohon pihak Kerajaan mengambil tindakan dengan kadar segera.”

[Menteri Dalam Negeri]

14. PR-1541-U(27)386

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan asas seperti beras tempatan, ayam dan telur ayam di pasaran.

Perancangan penyelesaian jangka pendek, jangka panjang yang komprehensif serta penguatkuasaan yang lebih 'keras' terhadap golongan kartel orang tengah antara faktor pengukuhan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan.

Kerajaan tidak seharusnya melepaskan tanggungjawab menjaga keterjaminan bekalan makanan kepada pengguna sebagai *end user* mahupun menyarankan penyelesaian jalan mudah seperti menambah import makanan tetapi perlu mencari penyelesaian sepanjang rangkaian jaringan bekalan bahan makanan mentah bagi memastikan keterjaminan makanan (*food security*). Memohon pihak Kerajaan mengambil tindakan dengan kadar segera."

[Menteri Pertanian dan Keterjaminan Makanan]

15. PR-1541-U(27)387

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan sering kali mendatangkan kerugian besar hingga jutaan ringgit setiap kali berlaku bencana alam.

Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka. Memohon pihak kerajaan mengambil tindakan dengan kadar segera."

[Menteri Pertanian dan Keterjaminan Makanan]

16. PR-1541-U(27)388

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron.

Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan.

Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan.

Mohon pihak Kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara. Memohon pihak Kerajaan mengambil tindakan dengan kadar segera."

[Perdana Menteri]

17. PR-1541-U(27)389

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMKe-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan.

Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan negeri khususnya di Perlis untuk mempelbagaikan fungsi sesuatu projek sedangkan Kerajaan negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu.

Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek. Memohon pihak Kerajaan mengambil tindakan dengan kadar segera."

[Menteri Ekonomi]

18. PR-1541-U(27)390

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar *rebranding* daripada Kerajaan sebelum ini kerana perubahan yang besar perlu dilakukan bagi menepati kenaikan kos pembinaan disebabkan kenaikan harga barang binaan.

Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja.

Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. Memohon pihak Kerajaan mengambil tindakan dengan kadar segera."

[Menteri Perumahan dan Kerajaan Tempatan]

19. PR-1541-U(27)391

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media.

Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan.

Oleh hal demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu. Memohon pihak Kerajaan mengambil tindakan dengan kadar segera."

[Menteri Komunikasi]

20. PR-1541-U(27)392

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan masuk dan keluar sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu.

Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya.

Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu.

Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka. Memohon pihak Kerajaan mengambil tindakan dengan kadar segera."

[Menteri Dalam Negeri]

21. PR-1541-U(27)393

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengkaji semula dasar sedia ada yang berkaitan Warisan Arkeologi Negara dan merangka satu pelan tindakan khusus bagi memartabatkan Warisan Arkeologi Negara yang ditemukan. Penemuan-penemuan arkeologi seperti artifak tembikar, seramik, lukisan purba, rangka manusia purba dan lain-lain artifak amat penting untuk dihayati dan dipelajari kerana data yang dihasilkan dapat membantu merungkai persoalan-persoalan tentang perkembangan hidup dan tamadun manusia silam.

Malahan, ia juga boleh dijadikan sebagai salah satu sumber rujukan pensejarahan negara yang utama. Akan tetapi masih banyak lagi tapak-tapak penemuan arkeologi yang ditemukan tidak dikaji sepenuhnya kerana beberapa faktor terutamanya kekangan kewangan hingga menyebabkan kebanyakan tapak tersebut ditinggalkan tanpa sebarang kajian menyeluruh mahupun pemeliharaan khusus.

Oleh yang demikian, Kerajaan melalui Kementerian Pelancongan, Seni dan Budaya (MOTAC) wajar mengkaji dan merangka satu pelan tindakan bagi memartabatkan Warisan Arkeologi Negara yang ditemukan supaya tapak-tapak arkeologi tersebut dapat dijadikan sebagai subjek kebanggaan dan identiti negara yang berbilang kaum dan agama yang boleh dihayati dan diambil iktibar.

MOTAC amnya boleh mengambil contoh kerangka tindakan daripada negara lain seperti China, Korea, Jepun dan Turki tentang kaedah-kaedah kajian, pemeliharaan dan pemuliharaan yang telah mereka berjaya lakukan melalui kerjasama strategik antara negara.

Hal ini juga sekaligus akan dapat menangani isu kemerosotan minat generasi muda terhadap Sejarah kerana generasi ini dilihat lebih cenderung untuk mengikuti perkembangan teknologi digital dan hiburan. Pembentukan generasi muda yang bakal menjadi pemimpin negara amat penting melalui pendekatan sejarah ini agar semangat kenegaraan atau cinta akan negara itu dapat dipupuk sebaiknya. Memohon pihak Kerajaan mengambil tindakan dengan kadar segera."

[Menteri Pelancongan, Seni dan Budaya]

22. PR-1541-U(27)394

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menyegerakan kelulusan dan penyaluran peruntukan pembangunan infrastruktur dan kemudahan terutamanya melibatkan penurapan tar di jalan-jalan yang menghubungkan laluan ke perkampungan Orang Asli dan memperbanyakkan pemasangan lampu jalan di Nenggiri, Kelantan.

Dalam Pilihan Raya Kecil (PRK) Dun Nenggiri baru-baru ini, pihak Kerajaan telah mengetahui bahawa kawasan tersebut memerlukan peruntukan pembangunan infrastruktur dan kemudahan yang menyeluruh khususnya di kawasan perkampungan Orang Asli seperti Pos Gob, Pos Tohoi, Pos Simpor dan Pos Pasik.

Oleh yang demikian, Kerajaan melalui Kementerian Kemajuan Desa dan Wilayah (KKDW) wajar mengambil perhatian dan tindakan segera terhadap kekurangan infrastruktur dan kemudahan di kawasan perkampungan Orang Asli di Nenggiri Kelantan kerana mereka juga adalah sebahagian daripada rakyat negara ini yang mempunyai hak untuk menikmati segala kemudahan yang disediakan kerajaan. Memohon pihak Kerajaan mengambil tindakan dengan kadar segera."

[Menteri Kemajuan Desa dan Wilayah]

23. PR-1541-U(27)395

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran royalti petroleum kepada negeri Terengganu dan Kelantan sebagai komitmen dalam memastikan pengagihan hasil petroleum yang adil dan saksama.

Tuntutan ini adalah selaras dengan hak rakyat dan negeri sebagaimana termaktub dalam Akta Kemajuan Petroleum 1974. Kedudukan pelantar minyak juga bersetentang dengan kawasan perairan negeri Terengganu dan Kelantan. Prinsip Federalisme perlu dihormati dan dipatuhi Kerajaan Persekutuan dengan menunaikan hak yang dituntut oleh rakyat di kedua-dua negeri tersebut. Memohon pihak Kerajaan mengambil tindakan dengan kadar segera."

[Menteri Kewangan]

24. PR-1541-U(27)396

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan Persekutuan melaksanakan pembayaran Wang Ehsan kepada negeri-negeri di bawah pentadbiran Pembangkang. Pembangunan seimbang antara wilayah amat penting agar rakyat menikmati kemudahan infrastruktur dan kemudahan yang setara. Bantuan Wang Ehsan ini akan dapat membantu negeri-negeri tersebut melaksanakan agenda pembangunan dan kesejahteraan rakyat amnya. Memohon pihak Kerajaan mengambil tindakan dengan kadar segera."

[Perdana Menteri]

25. PR-1541-U(27)397

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan sepenuh perhatian kepada Beting Patinggi Ali, yang juga dikenali sebagai Luconia Shoals, terletak di perairan Sarawak dan merupakan sebahagian daripada Zon Ekonomi Eksklusif (EEZ) Malaysia. Isu pencerobohan oleh kapal dan pesawat asing, terutamanya dari China telah menjadi persoalan rakyat memandangkan ia berkaitan dengan kedaulatan negara dan kepentingan awam. Sejak tahun 2013, Malaysia telah melaporkan pencerobohan berulang oleh kapal Pengawal Pantai China (CCG) di kawasan ini. Tuntutan China terhadap Beting Patinggi Ali dianggap tidak berasas kerana lokasi geografi kawasan tersebut yang lebih dekat dengan pantai Malaysia (84 nautica miles dari Miri) berbanding dengan tanah besar China (sekitar 1000 nautica miles).

Walaupun Malaysia menganggap Beting Patinggi Ali sebagai miliknya, Kerajaan masih berpendirian terdapat tuntutan bertindih dengan China. China menuntut sebagian besar wilayah di Laut China Selatan berdasarkan garis sembilan dash yang mereka tetapkan, yang telah ditolak oleh Mahkamah Permahan Tetap (PCA) pada tahun 2016. Keputusan PCA ini memberikan Malaysia posisi yang lebih kuat untuk menegaskan haknya di kawasan tersebut.

Untuk memastikan kedaulatan ke atas Beting Patinggi Ali, Malaysia perlu meningkatkan lagi kehadiran aset ketenteraan di kawasan tersebut bagi mengukuhkan tuntutan negara terhadap pulau tersebut dan mempergiatkan keberadaan Malaysia di pulau berkenaan. Mohon kerajaan untuk lebih tegas dalam pendiriannya di mana isu Beting Patinggi Ali adalah hak mutlak Malaysia sepertimana termaktub dalam Konvensi Bangsa-Bangsa Bersatu tentang Hukum Laut (UNCLOS) dan bukannya tuntutan bertindih dengan mana-mana negara asing. Memohon pihak Kerajaan mengambil tindakan dengan kadar segera."

[Menteri Pertahanan]

26. PR-1541-U(27)398

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan memberikan hak royalti kepada negeri Kelantan yang tidak dibayar oleh Kerajaan Persekutuan sering kali menjadi perdebatan hangat, terutamanya berkaitan dengan alasan "lebih 3 batu nautika". Kelantan, sebagai salah satu negeri pengeluar minyak di Malaysia, telah lama menuntut hak royalti minyak yang sepatutnya diterima. Namun, Kerajaan Persekutuan berpendapat bahawa Kelantan tidak layak menerima royalti tersebut kerana kedudukan telaga minyak yang terletak lebih dari tiga batu nautika dari pesisir pantai negeri tersebut.

Kerajaan Persekutuan perlu menyemak atau meminda kembali istilah "tiga batu nautika" yang tidak pernah dinyatakan dalam perjanjian asal dengan Petronas. Berpendapat bahawa Akta 144 tidak menetapkan jarak tertentu untuk hak milik telaga minyak. Tambahan lagi, Telaga minyak yang dimiliki Kelantan terletak kira-kira 80 batu nautika dari pesisir pantai, dan terdapat dakwaan bahawa telaga-telaga ini berada dalam kawasan yang dipertikaikan antara Kelantan dan Terengganu. Ini menimbulkan persoalan mengenai keadilan dan keseragaman dalam pembayaran royalti, terutama apabila negeri-negeri lain seperti Terengganu menerima royalti walaupun telaga mereka juga terletak jauh dari pantai.

Dicadangkan penubuhan jawatankuasa bebas yang terdiri daripada wakil Kerajaan negeri, Kerajaan Persekutuan dan pakar undang-undang untuk meneliti semula perjanjian royalti dan isu-isu berkaitan. Ini dapat memastikan bahawa semua pihak terlibat dalam proses perbincangan yang adil dan terbuka serta mencari penyelesaian yang memuaskan kedua-dua belah pihak. Memohon pihak Kerajaan mengambil tindakan dengan kadar segera."

[Menteri Kewangan]

27. PR-1541-U(27)399

Dato' Seri Dr. Shahidan bin Kasim [Arau] akan mencadangkan :

"Bahawa Dewan ini menggesa Kerajaan Persekutuan untuk mempertimbangkan pembinaan jalan sempadan antara Malaysia dan Indonesia, khususnya di kawasan Sabah dan Kalimantan ini adalah penting untuk pelbagai aspek yang melibatkan ekonomi, keselamatan, dan pembangunan infrastruktur yang akan memulangkan hasil lumayan kepada Malaysia. Didapati bahawa jalan sempadan Malaysia – Indonesia ini akan meningkatkan kebolehcapaian antara kedua-dua negara, memudahkan pergerakan barang dan perkhidmatan. Ini akan merangsang aktiviti ekonomi di kawasan sempadan seperti Kalabakan dan Serudong, serta meningkatkan peluang perniagaan bagi penduduk tempatan.

Diingatkan, dengan pemindahan ibu negara Indonesia ke Kalimantan Timur (Nusantara), terdapat potensi besar untuk pertumbuhan ekonomi di kawasan sempadan. Pembinaan jalan akan membolehkan Sabah memanfaatkan perkembangan ini dengan lebih baik, termasuk dalam sektor pelancongan dan perdagangan rentas sempadan. Jalan sempadan ini dapat menghubungkan kampung-kampung pedalaman dengan bandar-bandar utama, memudahkan akses kepada pendidikan, kesihatan, dan peluang pekerjaan bagi penduduk di kawasan terpencil.

Pembinaan jalan sempadan Malaysia – Indonesia juga berpotensi memperkuat hubungan sosial dan budaya antara masyarakat di kedua-dua negara. Ini termasuk pertukaran budaya melalui pelbagai aktiviti sosial dan ekonomi yang dapat dijalankan lebih mudah dengan adanya infrastruktur yang baik. Memohon pihak Kerajaan mengambil tindakan dengan kadar segera."

[Perdana Menteri]

28. PR-1541-U(27)376

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera memperbaharui dasar insentif kenderaan diesel komersial menerusi penetapan piawaian Euro 5 sebagai keperluan minimum menjelang tahun 2026 bagi menggalakkan peralihan yang lebih pantas terhadap penggunaan teknologi rendah emisi dan secara tidak langsung menyumbang sebagai penyelesaian jangka panjang dalam menjaga kualiti udara negara.

Pada ketika ini, negara-negara jiran telah mula mengorak langkah lebih ke hadapan seperti Singapura yang telah lama beralih kepada penggunaan Euro 6 dan Thailand yang menerapkan Euro 5 sebagai piawaian minimum sedangkan Malaysia hanya melaksanakan piawaian Euro 4 mulai Januari 2025 dengan pemberian insentif 50 peratus kepada semua kenderaan yang memenuhi piawaian tersebut.

Ketinggalan ini ternyata menjejaskan daya saing Malaysia di peringkat serantau di samping meningkatkan risiko kesihatan sejagat akibat pelepasan nitrogen oksida dan zarah halus.

Kerajaan wajar mempercepatkan peralihan ini bagi memastikan pengurangan pelepasan bahan pencemar selaras dengan Peraturan-Peraturan Kualiti Alam Sekeliling (Kawalan Kandungan Bahan Api Petrol dan Diesel) 2007. Penguatkuasaan yang ketat dan sokongan infrastruktur yang lebih baik menerusi kerjasama rapat Kerajaan bersama pemain industri perlu disinergikan untuk memastikan peralihan ini kelak berjalan lancar."

[Menteri Sumber Asli dan Kelestarian Alam]

29. PR-1541-U(27)377

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera mengkaji semula kadar pelepasan cukai untuk individu dan tanggungan yang kini masih berjumlah RM9,000 dan tidak pernah disemak sejak tahun 2010.

Setelah 15 tahun berlalu, inflasi telah meningkat dengan ketara dan amaun tersebut tidak lagi realistik jika dibandingkan kos sara hidup pada hari ini. Atas pertimbangan tersebut, Kerajaan wajar menaikkan amaun pelepasan diri dan tanggungan ke RM12,000 yang bersamaan dengan RM1,000 setiap bulan, bagi menggambarkan senario serta realiti sebenar kehidupan rakyat Malaysia pada hari ini.

Malah dengan peningkatan amaun pelepasan cukai untuk individu dan tanggungan ini secara tidak langsung akan membantu golongan B40 dan M40 yang amat terkesan dengan inflasi dan seterusnya mencerminkan keprihatinan Kerajaan dalam mengurangkan beban rakyat."

[Menteri Kewangan]

30. PR-1541-U(27)378

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memartabatkan pengamalan Rukun Negara dalam menjadi tonggak identiti, perpaduan dan keutuhan rakyat Malaysia.

Mutakhir ini, negara disajikan dengan berita dan laporan mengenai kes- kes penyebaran ucapan kebencian, penghinaan dan provokasi yang berbaur perkauman, ketegangan kaum, penipuan dan penegasan unsur- unsur subversif yang berpotensi mencetuskan ketegangan antara kaum dan agama di Malaysia menerusi pengguna di platform media sosial.

Media sosial hari ini juga kian dipenuhi dengan lambakan sikap ketidaksopanan dan kebiadaban dalam perbincangan sehingga menjadi seperti satu kelaziman untuk para pengguna media sosial menggunakan bahasa kasar, lucah malah menyerang peribadi antara satu sama lain sehingga mengabaikan nilai kesopanan.

Hal ini mencerminkan kelemahan penghayatan nilai serta elemen Rukun Negara itu sendiri dalam kalangan rakyat Malaysia dan justeru itu, menjadi tanggungjawab Kerajaan untuk mewujudkan sebuah mekanisme yang lebih berkesan dalam menyuburkan pembudayaan setiap prinsip yang terkandung di dalam Rukun Negara sebagai penawar bagi menangani gejala kebejatan akhlak sebegini di platform media sosial. "

[Menteri Perpaduan Negara]

31. PR-1541-U(27)379

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mengkaji semula cukai korporat Malaysia yang sehingga kini adalah antara yang tertinggi di Asia Tenggara iaitu sebanyak 24 peratus berbanding negara-negara jiran lain seperti, Singapura (17 peratus), Brunei (18.5 peratus), Cambodia (20 peratus), Vietnam (20 peratus), Thailand (20 peratus), dan Indonesia sekitar 21 peratus.

Perbandingan ini semakin jelas jika dilihat dengan situasi kadar cukai Amerika Syarikat (AS). Pada tahun 2016, cukai korporat mereka adalah sekitar 35 peratus, namun kini cukai korporat mereka telah turun sehingga 21 peratus manakala Malaysia kekal pada kadar sama iaitu 24 peratus sehingga sekarang.

Kadar cukai korporat yang tinggi ini ternyata melemahkan daya saing Malaysia untuk bersaing dengan negara-negara jiran bagi menarik tumpuan pelabur untuk melabur di sini.

Oleh yang demikian, Kerajaan perlu merangka satu kajian yang lebih komprehensif bagi menurunkan kadar cukai korporat ini agar setanding dengan kadar serantau untuk menjadikan Malaysia lebih kompetitif serta berdaya maju dalam meraih tumpuan pelabur antarabangsa yang akhirnya akan menguntungkan negara, peniaga dan rakyat jelata. "

[Menteri Kewangan]

32. PR-1541-U(27)380

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk memastikan kenaikan caj perubatan di hospital dan klinik swasta yang semakin mendapat perhatian di kebanyakan negara termasuk di Malaysia segera ditangani dengan baik oleh Kerajaan memandangkan implikasinya yang besar kepada para pesakit serta sistem kesihatan negara secara keseluruhannya.

Pelbagai faktor mendorong kepada isu ini dengan antaranya ialah kadar caj konsultasi doktor (GP) swasta yang dikawal oleh Akta Kemudahan dan Perkhidmatan Jagaan Kesihatan Swasta (PHFSA) 1998 tidak pernah mengalami sebarang perubahan selama lebih 32 tahun dan menyebabkan pihak terbabit terpaksa menaikkan caj kos operasi yang semakin meningkat, termasuk sewa premis, kos utiliti, peralatan perubatan serta perbelanjaan berkaitan teknologi dan sumber manusia telah meletakkan tekanan besar ke atas klinik swasta.

Situasi tersebut juga diburukkan lagi oleh isu berkaitan Pentadbir Pihak Ketiga (TPA) yang menguruskan pembayaran bagi pesakit yang mempunyai insurans kesihatan yang turut mengalami kenaikan.

Oleh yang demikian, Kerajaan digesa untuk meminda Akta Perkhidmatan Hospital Swasta bagi menetapkan kadar maksimum bagi caj rawatan selain konsultasi doktor, seperti caj penginapan dan penggunaan alat perubatan selain memperkenalkan sistem tiering seperti penarafan hotel bagi membezakan hospital berdasarkan tahap perkhidmatan, membolehkan syarikat insurans menawarkan pelbagai pakej berdasarkan akses kepada hospital tertentu, sesuai dengan kemampuan pelanggan serta mempergiat inisiatif di bawah kerjasama awam dan swasta bagi menyediakan rawatan mampu milik kepada golongan berpendapatan rendah. "

[Menteri Kesihatan]

33. PR-1541-U(27)381

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mempertimbangkan semula keputusan Kumpulan Wang Simpanan Pekerja (KWSP) yang menjual hampir 10 peratus kepentingan saham ketika harga rendah selepas Disember 2022, sedangkan KWSP telah lama merancang untuk menambah lebih banyak saham Malaysia Airports Holdings Bhd (MAHB) untuk menswastakannya.

Pada 29 November 2022, KWSP telah memiliki 259,917,492 saham iaitu sekitar 15.67 peratus di dalam MAHB dan dalam tempoh satu tahun, KWSP telah menjual 163,363,080 saham, atau hampir 10 peratus kepentingan pada harga sekitar RM6.74 hingga RM7.70 sesaham. Manakala pada 28 Disember 2023 pula, akhirnya KWSP hanya memiliki 96,554,412 saham atau 5.79 peratus sahaja.

Penjualan sebegitu besar dalam tempoh singkat tidak pernah berlaku sebelum ini dan ini menimbulkan persoalan mengapa saham tersebut dijual pada harga rendah tetapi dibeli semula pada harga RM11.00 dengan implikasinya ialah KWSP akan terpaksa membayar tambahan sebanyak RM539 juta sehingga RM696 juta bagi membeli balik saham tersebut.

Justeru itu, Kerajaan digesa untuk mempertimbang dan mengkaji semula keputusan ini dengan lebih berhati-hati memandangkan perkara ini telah menimbulkan keresahan awam kerana membabitkan dana 16.1 juta rakyat Malaysia yang merupakan pencarum KWSP. "

[Menteri Kewangan]

34. PR-1541-U(27)382

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk kembali mempertimbangkan pelaksanaan Cukai Barangan dan Perkhidmatan (GST). Dengan mengambil kira implikasi ekonomi Malaysia yang pada masa ini berada pada tahap yang agak baik serta kestabilan Kerajaan Perpaduan pimpinan YAB Perdana Menteri yang semakin mengukuh, telah ramai pihak termasuklah penganalisis bank berpendapat sekarang adalah masa yang tepat untuk Kerajaan memperkenalkan semula GST.

Menerusi GST, Kerajaan berpotensi untuk meluaskan lagi asas cukai bagi mengurangkan defisit fiskal, mewujudkan ruang utama untuk pelaburan infrastruktur serta menghasilkan peluang bagi mengawal hutang negara dengan lebih baik. Malah, dengan pelaksanaan berperingkat e-invois bermula 1 Ogos 2024, yang juga merupakan antara komponen GST, telah memberikan ruang yang baik untuk Kerajaan melaksanakan kembali GST.

Malaysia tidak harus tertinggal di belakang negara Asia Tenggara lain yang telah melaksanakan GST seperti Indonesia yang melaksanakan Value Added Tax (VAT) pada 1985, Thailand pada tahun 1992 dan Singapura pada 1994 selain GST ini telah dilaksanakan di lebih 170 negara.

Kerajaan boleh menstrukturkan semula GST dengan lebih kemas melalui kerangka dasar yang komprehensif meliputi semua barangan dan perkhidmatan dengan sesetengah barangan boleh dikecualikan, selain satu kadar cukai yang dianggap positif. "

[Menteri Kewangan]

35. PR-1541-U(27)383

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk menimbangkan pengecualian daripada pengeluaran e-Invois kepada Perusahaan Mikro, Kecil dan Sederhana (PMKS) yang mempunyai jualan tahunan di bawah RM500,000 berbanding ketetapan semasa Kerajaan iaitu pengecualian untuk peniaga yang mencatatkan jualan tahunan bawah RM150,000 menjelang pelaksanaan menyeluruh e-Invois bermula 1 Julai 2025.

Pelaksanaan e-Invois ini ternyata telah mewujudkan kebimbangan dalam kalangan para pemain PMKS yang terpaksa menghadapi kekangan kos berikutan perbelanjaan yang tinggi bagi menyediakan sistem pengeluaran serta penyelenggaraan e-Invois di samping risiko margin keuntungan yang rendah.

Peningkatan siling pengecualian e-Invois kepada RM500,000 adalah lebih relevan seperti mana yang pernah dilakukan oleh Kerajaan ketika melaksanakan Cukai Barangan dan Perkhidmatan (GST) sebelum ini dan sekaligus mengurangkan beban lebih banyak segmen pemain PMKS seperti pengusaha yang berniaga dari rumah, ibu tunggal dan peniaga luar bandar yang terpaksa menanggung bebanan implikasi kos yang tinggi.

Oleh yang demikian, Kerajaan disaran untuk mempertimbangkan syor peningkatan pengecualian kepada RM500,000 ini bagi mengurangkan keresahan pemain PMKS dengan pelaksanaan e-Invois yang sebenarnya boleh dielakkan sekiranya Kerajaan memperkenalkan semula GST. "

[Menteri Kewangan]

36. PR-1541-U(27)373

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk melaksanakan kajian secara holistik dan komprehensif bagi menghasilkan benih padi yang berkualiti serta mampu bertahan dalam keadaan perubahan cuaca ekstrem di Malaysia.

Kebelakangan ini perubahan iklim yang ketara telah menjejaskan hasil pengeluaran padi tempatan sebanyak 83,408 tan metrik bersamaan 5.84 juta 10 kilogram pek beras disebabkan oleh musim tengkujuh dan banjir. Penjadualan penanaman padi amat terdedah dengan bencana banjir di musim tengkujuh pada hujung tahun manakala musim penanaman semula padi pada awal tahun pula berisiko diancam keadaan cuaca panas melampau yang perlu diatasi dengan kadar segera.

Sehubungan itu, pihak Kerajaan perlu mengambil langkah yang lebih tegas dan efisien dalam menangani isu ini yang bukan sahaja bagi mempercepatkan pengagihan benih padi kepada pesawah supaya jadual penanaman padi tidak terganggu, malah pihak Kerajaan juga perlu membuat kajian yang teliti bagi menghasilkan benih padi yang lebih berdaya tahan dengan perubahan iklim di Malaysia."

[Menteri Pertanian dan Keterjaminan Makanan]

37. PR-1541-U(27)375

Dato' Sri Dr. Wee Jeck Seng [Tanjung Piai] akan mencadangkan :

"Bahawa Dewan Rakyat ini menggesa Kerajaan untuk menjalankan penelitian semula terhadap kajian bagi persediaan serta perancangan pelan pembangunan pendidikan jangka panjang bagi negara.

Mutakhir ini, kita telah dihabarkan pelbagai peristiwa yang menimbulkan kekusaran masyarakat terhadap ketandusan pembangunan modal insan negara ini terutamanya terhadap generasi baharu yang merupakan generasi yang bakal memimpin dan mentadbir negara tercinta satu hari nanti.

Situasi ini diburukkan lagi dengan statistik kegagalan para pelajar untuk menduduki Sijil Pelajaran Malaysia (SPM) yang hampir setiap tahun mencapai angka yang membimbangkan sehingga mencetuskan kebimbangan. Sejauh mana keseriusan generasi muda ini menilai kepentingan mendapatkan pendidikan untuk membina kehidupan yang lebih baik.

Dalam keadaan negara serantau yang kian pesat membangun, kesediaan dalam melahirkan modal insan menjadi sangat kritikal terutamanya bagi melahirkan generasi yang mampu berdaya saing dan mendepani cabaran serta persaingan dengan negara-negara serantau.

Oleh yang demikian, Kerajaan perlu mengambil pendekatan berstrategi menerusi pembangunan semula pelan pembangunan pendidikan yang lebih efisien bagi memastikan negara kita mampu untuk melahirkan pakej modal insan yang lengkap dan mampu berdaya saing."

[Menteri Pendidikan]

38. PR-1541-U(27)374

Kapten Dato' Dr. Zulkafperi bin Hanapi (Bersara) [Tanjong Karang] akan mencadangkan :

"Bahawa Dewan ini menggesa Kerajaan supaya melaksanakan segera Skim Pembiayaan Kesihatan Kebangsaan demi kepentingan kesejahteraan rakyat serta kemapanan dan kelestarian KKM itu sendiri.

Situasi semasa menunjukkan KKM sangat terbeban dengan belanja mengurus yang sangat tinggi iaitu sehingga 85.07% atau RM38 bilion daripada bajet keseluruhan KKM dan hanya 14.9% yang diperuntukkan untuk bajet pembangunan maka keadaan ini sangat tidak sihat untuk kemapanan dan kelestarian KKM itu sendiri.

Kelemahan, ketidakmampuan dan kegagalan KKM terlihat jelas dengan segala masalah-masalah yang sentiasa menjadi rungutan rakyat dan juga sering diangkat oleh ramai Ahli-ahli Parlimen - seperti kekurangan jururawat, kekurangan doktor dan doktor pakar serta masalah doktor kontrak, Kekurangan ambulans, ketiadaan ubat, alat-alat perubatan terlalu lama, klinik-klinik daif, hospital yang berumur lebih 50 tahun, hospital yang sesak, tiada sistem komputer, pesakit terpaksa menunggu terlalu lama.

Ketahuilah permasalahan dan segala kelemahan KKM ini sebenarnya adalah manifestasi dari kekangan fiskal KKM itu sendiri. Keupayaan KKM dengan 14.9% bajet untuk Pembangunan adalah sangat-sangat terbatas dan ini boleh menyebabkan kualiti dan mutu perkhidmatan KKM terjejas dan terus dipersoalkan rakyat.

Dengan situasi begini adalah diharapkan penyelesaian segera dan menyeluruh dengan menubuhkan Jawatankuasa Bertindak bagi melaksanakan segera Skim Pembiayaan Kesihatan Kebangsaan."

[Menteri Kesihatan]

39. PR-1541-U(27)400

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan menerima kewujudan Seksyen (1) Perkara 112C Bahagian 4 Jadual Kesepuluh dan Seksyen (2) Bahagian 4 Jadual Kesepuluh dalam Perlembagaan Persekutuan serta penguatkuasaannya dan menerima hakikat bahawa hak ini adalah hak-hak Perlembagaan Rakyat Sabah.

Menerima juga hakikat bahawa kekeliruan dalam pelaksanaan hak-hak perlembagaan ini dan bahawa selama 44 tahun (1974 – 2018), kadar pemberian khas di bawah peruntukan tersebut gagal dikaji oleh Kerajaan Persekutuan.

Memperakui langkah-langkah yang telah diambil oleh pihak Kerajaan selepas penubuhan Kerajaan Pakatan Harapan 2018 sehingga kini iaitu bermula dengan menaikkan pemberian kepada RM53.4 juta, kemudian dinaikkan Kerajaan Perikatan Nasional ke RM125.6 juta, pada tahun 2023, dan kemudian Kerajaan Madani naikan kepada RM300 juta dan baru-baru ini dinaikkan lagi kepada RM600 juta.

Dan menerima hakikat bahawa semua langkah-langkah ini bersifat sementara (interim) sebelum Kerajaan Sabah dan Kerajaan Persekutuan untuk melaksanakan hak Perlembagaan Rakyat Sabah sepenuhnya.

Menerima hakikat bahawa pelaksanaan ini mengambil masa begitu panjang sehingga sekarang iaitu negara Malaysia sudah berusia 61 tahun. Maka, Tuaran ingin mengusulkan supaya Dewan yang mulia ini membuat Keputusan untuk melaksanakan Hak Perlembagaan Rakyat Sabah ini secara tuntas termasuk meminda perkara 97(1) Perlembagaan Malaysia untuk membolehkan kerajaan Sabah memungut 40% daripada pungutan hasil Persekutuan daripada Sabah secara langsung."

[Perdana Menteri]

40. PR-1541-U(27)401

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Sejarah perang saudara di Selatan Filipina pada awal 70-an yang mengakibatkan ribuan pelarian perang dari Filipina melarikan diri ke Sabah. Menerima hakikat bahawa Pertubuhan Bangsa-Bangsa Bersatu (PBB) melalui Suruhanjaya Tinggi Persekutuan Bangsa-Bangsa Bersatu Untuk Pelarian (UNHCR) telah turun padang dan membantu pelarian ini dengan mewujudkan sekurang-kurangnya lima (5) skim penempatan pelarian di Sabah (Telipok, Kinarut, Kampung Bahagia Sandakan, Kampung Selamat Semporna dan Kampung Hidayat Tawau).

Dan menerima hakikat Kerjaan Sabah telah bekerjasama dengan UNHCR sehingga mewujudkan sebuah bahagian di Jabatan Ketua Menteri untuk menguruskan penempatan UNHCR ini.

Menerima juga hakikat apabila setelah UNHCR menyerahkan penempatan ini kepada Federal Task Force di bawah Majlis Keselamatan Negara, terdapat kecelaruan dari segi urus tadbir pelarian perang Filipina di Sabah, sehinggakan penempatan mereka telah bercampur aduk dengan mereka yang bukan pelarian yang menyebabkan banyak masalah dari segi urus tadbir kewarganegaraan dan pelbagai aspek bantuan kemanusiaan.

Menerima hakikat bahawa pelarian perang Filipina ini telah diberi pelbagai dokumen bermula dengan kad burung-burung, kad banci dan selepas itu dokumen IMM13 sehingga sekarang. Menerima juga hakikat bahawa pelbagai pendekatan untuk menaik taraf bentuk dan cara pengeluaran dokumen ini telah banyak dipolitikkan dan akhirnya kini tidak ada kata putus apakah dokumen baru yang diberikan kepada golongan pelarian perang Filipina ini.

Menerima juga hakikat bahawa satu Suruhanjaya Siasatan Diraja telah ditubuhkan oleh Parlimen Malaysia mencari penyelesaian tuntas terhadap kehadiran golongan pelarian perang Filipina di Sabah, namun itu pun telah gagal memberi apa-apa penyelesaian, Malah ramai yang menganggap langkah ini sebagai mainan politik semata-mata.

Oleh sebab itu, Tuan mengesyorkan supaya Dewan yang mulia ini membahaskan masalah pelarian perang Filipina dengan mengambil kira bagaimanakah masa depan mereka yang kini sudah tiga generasi beranak pinak di Sabah sehingga Kerajaan dapat mengambil Tindakan yang tegas sebelum masalah ini menjadi lebih besar yang boleh menggugat kestabilan dan kedaulatan negara."

[Perdana Menteri]

41. PR-1541-U(27)402

Datuk Seri Panglima Madius Tangau [Tuan] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa kos pembekalan elektrik (penjanaan, penghantaran dan pengagihan) di Sabah adalah lebih tinggi daripada kadar jualan seunit elektrik menyebabkan Sabah Electricity Sdn. Bhd (SESB) mengalami kerugian dan terpaksa bergantung kepada subsidi sokongan tarif (TSS) daripada Persekutuan dengan kadar RM850 juta setahun.

Menerima juga hakikat bahawa Kerajaan perlu mengambil langkah-langkah bagi memastikan penjanaan elektrik mencapai 40% rizab margin dan kos pembekalan elektrik berada di bawah paras jualan untuk mengurangkan beban Kerajaan Persekutuan dalam menampung subsidi sokongan tarif (TSS).

Oleh itu, maka dengan ini Tuan mengesyorkan agar Dewan yang mulia ini dapat membahaskan langkah-langkah yang boleh diambil sehingga Kerajaan dapat mencari jalan penyelesaian yang tepat untuk menstabilkan bekalan elektrik di Sabah."

[Menteri Peralihan Tenaga dan Transformasi Air]

42. PR-1541-U(27)403

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat bahawa import makanan negara masih lagi tinggi termasuklah makanan ternakan.

Dan menerima hakikat bahawa tanah yang masih luas untuk dimajukan sebagai tanah pertanian terdapat di Sabah dan Sarawak.

Menerima juga hakikat infrastruktur perhubungan masih lagi pada tahap yang rendah menyebabkan pelbagai usaha untuk meningkatkan keterjaminan makanan terhalang.

Maka itu, Tuaran mengusulkan agar Dewan yang mulia ini ditangguhkan untuk membincangkan langkah-langkah dalam mengatasi dan menaik taraf jalan-jalan pertanian di Sabah dan Sarawak."

[Menteri Pertanian dan Keterjaminan Makanan]

43. PR-1541-U(27)404

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima Hakikat bahawa kawal selia bekalan elektrik di Sabah telah pun diserahkan kepada Kerajaan Sabah daripada Kerajaan Persekutuan selepas Kelulusan Rang Undang-Undang Pihak Berkuasa Tenaga Boleh Baharu (Pindaan) 2023 (Akta 725) dan Rang Undang-Undang Pihak Berkuasa Pembangunan Tenaga Lestari (Pindaan) 2023 (Akta 726) dalam Dewan Rakyat pada 2023.

Menerima hakikat penyerahan kawal selia telah dimuktamadkan selepas Dewan Undangan Negeri (DUN) Sabah meluluskan tiga Rang Undang-Undang Perlembagaan Negeri Sabah pada 3 Januari 2024 berkaitan pengambilalihan kuasa kawal selia bekalan elektrik daripada Kerajaan Persekutuan membabitkan RUU Bekalan Elektrik 2024, Tenaga Boleh Baharu 2024 dan RUU Suruhanjaya Tenaga Sabah (Pindaan) 2024.

Dan menerima hakikat bahawa kawal selia bekalan elektrik di Sabah kini berada di bawah Suruhanjaya Tenaga Sabah (ECoS), manakala Wilayah Persekutuan Labuan masih di bawah seliaan Suruhanjaya Tenaga (ST) Malaysia.

Menerima juga hakikat bahawa Syarikat Sabah Electricity Sdn. Bhd. (SESB) merupakan satu-satunya Syarikat utiliti yang membekalkan tenaga elektrik kepada Wilayah Sabah dan wilayah Persekutuan Labuan.

Dan menerima hakikat bahawa geografi Labuan adalah lebih dekat dengan Sabah berbanding dengan Semenanjung Malaysia.

Justeru, Tuaran mengesyorkan agar Dewan yang mulia ini ditangguhkan bagi membuat keputusan pemindahan kawal selia bekalan elektrik Labuan daripada ST kepada ECoS bagi memudahkan pemantauan, meningkatkan kecekapan pengurusan serta mempermudah segala urusan dan menjimatkan kos."

[Menteri Peralihan Tenaga dan Transformasi Air]

44. PR-1541-U(27)405

Datuk Seri Panglima Madius Tangau [Tuaran] akan mencadangkan :

"Bahawa Dewan Rakyat ini menggesa Kerajaan Menerima hakikat Sejarah bahawa Pulau Labuan diserahkan oleh Kerajaan Sabah menjadi Wilayah Persekutuan dengan niat suci untuk tujuan membangunkan Labuan dengan pesat.

Menerima hakikat Kerajaan Persekutuan telah gagal membangunkan Labuan termasuk menyediakan utiliti bekalan air dan elektrik.

Menerima hakikat bahawa rakyat Labuan adalah juga rakyat Sabah yang masih terikat dengan adat istiadat Sabah dan oleh itu masih lagi memerlukan perkhidmatan sistem Mahkamah Anak Negeri dan seterusnya memerlukan bimbingan dan perkhidmatan di pelbagai agensi Kerajaan Sabah.

Menerima hakikat bahawa penyerahan Labuan sebagai Wilayah Persekutuan telah dibuat tanpa mengambil kira kesan terhadap persempadanan Sabah.

Dan menerima hakikat penyerahan Labuan sebagai Wilayah Persekutuan tidak diberi pampasan walau satu sen pun kepada Sabah.

Menerima hakikat bahawa Pulau Labuan terlalu dekat dengan Sabah dan penduduk serta rakyat Labuan mempunyai ikatan yang sangat kuat dengan penduduk Sabah.

Maka dengan itu, Tuaran menyusulkan di Dewan yang mulia ini agar Kerajaan Persekutuan mengembalikan semula Labuan kepada Sabah."

[Perdana Menteri]

**RISALAT-RISALAT YANG DIBAWA KE DALAM MESYUARAT
(DEWAN RAKYAT)**

<u>TAHUN 2025</u>	<u>RISALAT/DOKUMEN</u>	<u>TARIKH DIBENTANGKAN</u>
DR. 8	Penyata Jawatankuasa Kira-Kira Wang Negara (PAC) terhadap Tindakan Susulan Kementerian Kemajuan Desa dan Wilayah (KKDW) Bagi Syor-Syor Penyata PAC Parlimen berhubung Pengurusan MARA Incorporated Sdn Bhd (DR. 43 Tahun 2024)	5 Mac 2025
ST. 38	AKTA CUKAI PENDAPATAN 1967 Kaedah-Kaedah Cukai Pendapatan (Elaun Modal) (Kos Pembangunan bagi Perisian Komputer yang Dibuat Khas) 2024 P.U. (A) 327/2024 diwartakan pada 30 Oktober 2024	5 Mac 2025
ST. 39	AKTA CUKAI PENDAPATAN 1967 Kaedah-Kaedah Cukai Pendapatan (Elaun Modal Dipercepat) (Kelengkapan Teknologi Maklumat dan Komunikasi) 2024 P.U. (A) 328/2024 diwartakan pada 30 Oktober 2024	5 Mac 2025
ST. 40	AKTA CUKAI PENDAPATAN 1967 Perintah Cukai Pendapatan (Skim Hadiah Kemenangan Sukan) (Pengecualian) 2024 P.U. (A) 385/2024 diwartakan pada 27 November 2024	5 Mac 2025
ST. 41	AKTA CUKAI PENDAPATAN 1967 Kaedah-Kaedah Cukai Pendapatan (Sukuk Berkaitan Pelaburan Mampan dan Bertanggungjawab) 2024 P.U. (A) 415/2024 diwartakan pada 19 Disember 2024	5 Mac 2025
ST. 42	AKTA CUKAI PENDAPATAN 1967 Perintah Cukai Pendapatan (Sekuriti Islam) (Pengecualian) 2024 P.U. (A) 444/2024 diwartakan pada 23 Disember 2024	5 Mac 2025
ST. 43	AKTA CUKAI PENDAPATAN 1967 Perintah Cukai Pendapatan (Pengecualian) (No. 5) 2022 (Pindaan) 2024 P.U. (A) 451/2024 diwartakan pada 24 Disember 2024	5 Mac 2025

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2025</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST. 44	AKTA EKSAIS 1976 Perintah Duti Eksais (Pindaan) (No. 2) 2024 P.U. (A) 386/2024 diwartakan pada 13 Disember 2024	5 Mac 2025
ST. 45	AKTA LEVI KEUNTUNGAN LUAR BIASA 1998 Perintah Levi Keuntungan Luar Biasa (Buah Kelapa Sawit) (Pindaan) 2024 P.U. (A) 387/2024 diwartakan pada 16 Disember 2024	5 Mac 2025

****UCAPAN-UCAPAN**
(PERATURAN MESYUARAT 17)
(KAMAR KHAS)

Ahli Yang Berucap	Tajuk Ucapan	Menteri Yang Bertanggungjawab
YB Tuan Kesavan A/I Subramaniam (Sungai Siput)	1. Isu Belia Sungai Siput 2. Kursus Perkahwinan	1. YB Menteri Belia dan Sukan 2. YB Menteri Dalam Negeri
YB Datuk Seri Ir. Dr. Wee Ka Siong (Ayer Hitam)	1. Kelewatan Pembayaran Subsidi Khas Penternak Unggas	1. YB Menteri Pertanian dan Keterjaminan Makanan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**